

四庫全書

集部

欽定四庫全書

碧梧玩芳集卷二十一

宋 馬廷鸞 撰

讀史旬編

自序

讀史旬編者病叟暮年之所著也昔東萊呂太史著大事記其為書也曰記事列事之目無所褒貶抑揚曰通釋本易繫辭書詩序旁採劉向董仲舒史遷以及胡五峯之說明帝王之統紀曰解題為始學者設所載皆職

分之所當知非事駁雜求新奇出於人所不知也初公  
之為書本起春秋迄五代書未及成而絕筆於漢武帝  
征和三年朱文公屢惜之傷斯文之不續後學之不得  
私淑諸人也今輒不自揆本康節邵氏經世紀年圖朱  
文公通鑑綱目略倣呂氏義例而為讀史旬編旬者日  
之甲癸也書曰朞三百六旬是也吾書以日之甲癸比  
於年之甲癸謂之旬編自堯甲辰至五代周顯德七年  
庚申

原注周以此年正月四日方禪

三千三百一十七年為三百三十

二旬

原注末旬自甲至庚

類而編之自康節先生作皇極經世書

紀年始唐堯甲辰而堯之前無年可紀於是伏羲而下

至唐堯之前本易大傳家語五帝德與夫百家言皇墳

者書其槩以備太古之事而譜黃帝之世焉

原注譜黃帝所以譜

唐虞也唐虞皆為五帝而皆不傳於子則無可譜者

又自堯甲辰以下以至周平

王已未之前

原注太史公編年首共和庚申厲王居疑之歲月今但以春秋初年為斷

隨年

而書其事無事則虛其年終之以詩書雜傳所載以備

二帝三王之事而譜夏商之世焉

原注唐虞既無可譜周之世數未也未可

譜自孔子作春秋編年始周平王之四十九年己未終敬王之三十九年庚申魯西狩獲麟左氏傳終貞定王元年癸酉魯哀公如越是編入春秋之後列事目於前春秋之經是也述解題於後凡王事伯事之可論者著之諸國之事不著其他則有左氏之傳諸儒之經說不敢僭焉自司馬公作通鑑始周威烈王之二十三年戊寅而威烈王戊寅之前上距貞定之甲戌左傳之所不書通鑑之所未續則採劉道原外紀為傳鑑補遺之書

亦隨年書其事無事則虛其年而不敢遺焉通鑑戰國而下以至五代後周之前亦列事目於前朱公之綱目是也述解題於後倣東萊大事記閱諸家之史以廣其見聞集諸儒之說而訂其得失若征伐之本末制度之沿革亦粗及之而譜周至五季之世焉自黃帝迄五季其子孫之傳序已見於譜矣漢三國六朝北魏齊周以及五季其疆理之離合又為圖焉成書之首以通說數條論作史之源流歷代之首則以皇極經世數考氣運

之推遷凡此皆職分之所當知者而愚恨其不能盡知且聊欲便省記也其如孤陋寡聞何經始於壬午之冬徹編於乙酉之秋越三歲而後三十有八帙之書成姑以備遺忘授兒曹而已陳了翁言通鑑為藥山學者惟當愛日孜孜日遊此山而已吾老且倦遊矣東坡云脚力盡時山正好莫將有限趣無窮唐子西亦云棋罷收成敗書慵卷是非棋之成敗猶書之是非罷且慵之時収且卷之日也窺陳編以盜竊長兀兀以窮年豈七十

老翁事哉雖然是固不可不令兒輩覺也乙酉秋泮書

制作通說

余既攷古人制作之本末因稽其成書之歲月論春秋者  
言夫子感麟而作起獲麟故文止於所起踰再歲而  
夫子夢奠矣故歐陽公謂此夫子既老而成書春秋緯  
演孔圖云孔子修春秋九月而成卜之得陽豫之卦是  
春秋二百四十二年之書以九月而成也太史公整齊  
世傳論次其文七年而遭李陵之禍於是述陶唐迄麟



止是史記二千一百四十三年之書

原注年數  
張子節說

以七年

而成也司馬溫文正公受詔纂資治通鑑歷英宗神宗

二世十九年是通鑑一千三百六十二年之書以十九

年而成也李文定公纂本朝長編自紹興隆興乾道淳

熙節次上進收拾舊事垂四十年是長編一百六十八

年之書以四十年而成也至於朱文公綱目本舉要補

遺二書蓋在乾道八年壬辰之歲正月而語孟精義成

四月而通鑑綱目成是不半年而書成呂成公大事記

通釋解題本起春秋迄五代凡左氏通鑑已載者皆不  
書惟著其所不載者創始自淳熙七年以一日記一年  
越明年絕筆於漢武帝征和之三年而已不及竟矣書  
之難不其難乎時之難不尤難乎歲月遷流典籍浩博  
書以自警云

三皇五帝世譜

孟子曰博學而詳說之將以反說約也愚纂三皇五帝  
諸家正妄之說備錄於前所謂博學而詳說之而列歐

公邵子之言於後將以反說約也而復折衷於天台戴氏之說焉愚按呂成公之言曰太史公作五帝本紀既列敘其世系相因之本末而三代世系之所自出復總而叙於五帝紀之末篇以見帝王之治體統相承而出于一也秦則無復五帝三王之源流矣太史氏之書法豈拘儒曲士所能通其說乎雖然遷之興寄遠矣而欲彌縫世次聯屬相承則誠有如歐公之論遷固不能自通矣漢儒相承以此為定說如祭法禘郊祖宗虞夏皆

禘黃帝殷周皆禘讐是皆粗而言之由遷必欲實其父子相傳之說故也譬猶書君陳序周公既没命君陳分正東郊成周而鄭氏即曰君陳周公子也此豈可信乎學者詳之

外丙仲壬

湯崩太丁未立外丙二年仲壬四年太甲放桐殷人之制兄亡弟及此先儒據一代成法而有是言然觀商六百餘年間自沃丁以降立弟者十一君自太甲以降立

適者十二君然則兩說亦相半耳成湯既沒之後經無明文太史公以來諸儒從外丙仲壬更立之說為立弟河南邵氏程氏從漢孔氏外丙仲壬不立而太甲徑立之說為立適愚竊考殷人當日之制有適則立適太甲以下是也無適則立弟沃丁以下是也廢適而他立則亂太史公所指仲丁以來九世大亂是也五峯詆史遷而欲改史記本文仲丁為沃丁以為自沃丁至陽甲恰九世亂愚皆不敢以為然按史記云自仲丁以來廢適而

更立諸弟弟子或爭相代立比九世亂於是諸侯莫朝  
此史遷本文也據仲丁立其弟外壬外壬立其弟河亶  
甲意當時仲丁外壬未必無適乃再世立弟所謂廢適  
也亂之始也至若祖辛舍其子祖丁不立而立其弟沃  
甲沃甲舍其子南庚不立而立祖辛之子祖丁祖丁舍  
其子陽甲不立而立其諸父沃甲子南庚南庚又復立  
祖丁之子陽甲所謂更立諸弟子也於是仲丁以來九  
世亂矣蓋凡史遷之說非以無適而立弟之子為亂也

以廢適而立弟之子為亂也蓋亦非直以立弟之為亂也  
也以立弟之子之為亂也蓋自仲丁以來方有此仲丁  
而上不與焉此名何嘗誤就如胡氏之說必以仲丁為  
沃丁遂謂其立弟九世而九世生亂愚謂有以質之自  
沃丁立弟而後雍已立其弟為太戊太戊且能中興商  
室矣安在其為亂乎大抵商人立弟非亂制惟廢適乃  
亂制太史公既知其說則不當復錄外丙仲壬以為世  
次矣使當時不立太甲而立丙壬是廢適也恐湯尹之

時已亂而何必仲丁以來哉近世大儒有專攻書序者背河南程邵之說以為太甲服仲壬之喪為仲壬之後也夫營桐宮湯之葬地也密邇先王之訓湯之訓也太甲以兄子服叔父仲壬之喪而欲其思乃祖成湯之訓以為遷善改過之地伊尹之謀何其迂且拙耶故併辨之

### 文武受命之年

受命之說當以尚書大傳之言為正而改元也稱王也



皆非也劉氏徒辨其年而不辨其說何哉凡傳當以經為正經于武成稱惟九年大統未集經世於癸亥書周文王為西伯當以此為受命之年至己巳王崩則為七年與九年之說未合經於泰誓書惟十有一年伐殷經世於己巳書武王立至己卯克殷正合十一年其云十三者誤也若劉氏既主受命改元之說遂以十一十三為非武王之年乃從文王受命以來數之也愈舛矣

武王問箕子以殷亡殺紂是非箕子不忍言王

亦醜之間以天道作洪範

原注  
外紀

二帝揖遜以義理傳天下者也商周征伐以義理得天下者也堯舜禹三聖相授皆曰允執其中湯之誥曰惟皇上帝降衷於下民若有恒性克綏厥猷惟后武之誓曰惟天地萬物父母惟人萬物之靈亶聰明作元后中也衷也靈也皆義理精微之極也帝王揖遜征伐其迹雖殊而皆以義理之極為羣言之首蓋當時發明義理者有人焉唐虞之際道在皋陶故述惇典庸禮而以五

服五刑繼之夏商之際道在伊尹故論肇修人紀而以  
官刑終之商周之際道在箕子故演洪範九疇而以福  
極終之治源治法不偏廢也所以上遡執中之蘊也外  
紀顧言箕子不忍言紂而武王醜于克紂乃訪道而作  
範何歟

成王年幼周公恐天下畔乃踐阼攝政南面朝

諸侯

原注  
外紀

成王幼方亮陰周公為冢宰聽政事

原注  
古史

聽政是也攝政非也愚嘗論之太甲服成湯之喪亮陰不知政事禮之常也伊尹因其不明處之桐宮耳後世乃以為放君成王服武王之喪亮陰不言亦禮之常也周公因其年幼代之行事耳後世以為攝政攝政二字經所不言如書蔡仲之命惟曰周公位冢宰正百工羣叔流言而已詩之序文言周公攝政遠則四國流言近則王不知者講師之說云耳

厲王共和

太史公讀春秋歷譜牒至周厲王未嘗不廢書而歎蓋  
太史公十二諸侯年表序篇之說云爾是春秋譜之所  
由起也人知春秋編年不知編年始於共和之初人知  
春秋成而亂臣賊子懼而不知亂賊兆於厲王之世太  
史公之說微矣哉或曰紀年何必始於共和曰康節經  
世書始堯即位甲辰者疑年也史遷始共和紀年者實  
年也惟其疑故甲辰紀元起於皇甫謐之說而外紀附  
注或曰戊寅辛卯滋紛紛矣胡五峯謂邵氏精極天地之

數必不妄是以從之惟其實故共和庚申紀年之後千歲之厯可紀無異說也然亦非一朝一夕之故蓋周自昭王以後無年可紀三統厯劉歆本史記魯世家推魯之年以紀周之年自伯禽以後魯之傳序皆有年可書諸國之所無也此固魯秉周禮之一驗耳

貞定王三年乙亥晉空桐震臺舍壞人多死

自貞定王三年乙亥之地震至威烈王二十年乙亥之犬禍蓋六十年間天下之大災異皆在晉而不在他國

豈他國之史不書而晉史獨存耶天人之際必有可言者矣晉天下莫彊之國中原之全壤先帝王之所經營之舊也一旦裂於三家非小變也夫禍之明年又明年三晉請命於周又明年周命三晉為諸侯而晉國亡矣精祲之相通固如此夫

春秋十二諸侯譜

嗚呼威烈之二十三年通鑑之初有天下之大變焉蓋十二諸侯出於共和之初下逮春秋變而為七國則通

鑑之初年也何則當春秋之末魯雖為三家而悼公猶魯也齊雖為田氏而平公猶齊也晉雖為四家而定公猶晉也獨曹亡於春秋之末終陳亡於孔子卒之年蓋小國寡民是以先亡君子無譏焉閱六十餘年至通鑑之初天下之大國七秦楚燕為舊國而三晉裂為魏趙韓呂氏之齊篡為田氏之齊此四國者皆非聖賢之裔矣太史公六國表拳拳於秦之興而不暇諄復於十二諸侯之亡後之覽史者宜有考焉



魏文侯

夢奠之後師亡友散春秋且為戰國矣而聖人之後猶著於魯聖人之徒見師於魏魯之削滋甚子思固不足以回旋其間而秉禮用儒則其遺風猶在也魏文侯篡竊之餘且猶有尊賢尚德之意此空谷之足音也然子思言論風旨異時其門人孟子猶有傳焉子夏之云為不少槩見於魏者何也史記稱其居西河教授而劉氏云今同州河西縣有子夏石室學堂在焉意者其老於

西河西河之民疑於夫子之時魏文侯因以師禮尊事  
之而無復有從容諷導於其朝之益也顧文侯區區之  
心猶足稱者使其繼世此風不墜以及惠王之世孟子  
出而繼之相與扶持世教王道其庶幾乎文侯區區之  
心再傳而影響不存則公孫衍張儀之流已颯然至矣  
惜哉故愚於傳鑑補遺之終編備論其事焉

### 商鞅

商君之仕秦身遺其利而身蹈其患者也秦人之於商

君陽殺其人而陰袒其術者也彼其負罪出走不之他國而之魏者得非以舊邦之猶可以逃難耶六國之見攻於秦也其禍首於魏秦之攻魏也其謀專於商君亦既駕言舊好襲虜其將而又欲憑藉舊國逋逃其身是以市井之行自處而以君子長者之道望人也蘇東坡詩曰豈惟公子印社鬼亦遭謾斯足以發千古一笑而已農戰篇之說以為豪傑皆學詩書以避農戰則國削且貧秦人徇其說卒至於焚詩書而後快曾不知隴上

輟耕太息而起者皆農戰之人也鞅之得失如此劉歆  
新序之論方且誇之以為書之無黨無偏詩之如砥如  
矢司馬法之勵戎士后稷之勤農業無以易此是以鞅  
為三代之英也國師公之反理詭道久矣本朝王荆公  
又翼之曰今人未可輕商鞅商鞅能令令必行吾從祖  
老山翁斥之曰商鞅何人也車裂以徇之人也鞅而不  
可輕則孰可輕也此論可與太史公並著云

蘇秦

秦說六國凡言其形勢甲兵之盛與其主之賢容有辨  
士大言佞語至於論六國與秦相交之利害則皆鑿鑿  
精實無一語妄至於說趙語中有曰明主外料其敵之  
彊弱內度其士卒賢不肖不待兩軍相當而勝敗存亡  
之機固已形於胷中矣豈揜於衆人之言而以冥冥決  
事哉此數言者自孔子孟子以仁義告時君之外如欲  
陳當世利害之實孰踰於此又豈可以辯士廢哉其說  
趙魏楚三國必有數語及人臣過計竊意此三國者必

有大臣陰主事秦之說是以及之又其餘國之君率皆  
唯唯聽命楚王獨能以其國之安危利害與之深謀則  
威王之所以自謀其國者亦可謂操危而慮深矣儻非  
傳其子懷王則張儀豈得售其術而至六千里為讐人  
役哉

東西二周

東西二周之所謂君者周公之後得其地而各自稱君  
非王叔之謂也索隱于西周君下注曰周公西周武公

也時王赧微弱不主盟會寄居西周耳然以區區二周介乎秦楚韓魏之間此四國者不復以天子尊周而常以小侯怨周於是每借辯士之口左右販鬻崎嶇自存者五六年哀哉國策分東西周各自為篇史記所書亦多貿亂曰西周東周而又曰周則不知其孰東而孰西也

封建郡縣

封建郡縣之說古今一大議論也論封建者至胡氏而

詳論郡縣者至蘇氏而盡朱文公又反覆明備且有以處封建郡縣之間然論秦之趣亡無擇於封建郡縣者是知秦惡之浮於桀紂也謀秦之所以存而欲其續六國之祀以為封建是不知秦之不可與為湯武也漢高帝除秦亂而興猶不欲立六國後況以責之秦乎封建良法也亦曰有關雎麟趾之意然後可以行周官之法度耳

東坡五峯二公之論相為矛盾而皆未免有遺論也謂



封建可以禦戎狄乎千八百國尚存而大戎入周室矣  
謂郡縣可以息篡弒乎三十六郡甫置而趙高弒二世  
矣論封建者至朱文公治體之說而止論郡縣者至蘇  
黃門隨勢之說而止

以張敖故臣田叔等十人為郡守諸侯相

蓋公能教曹參以定齊田叔能明趙王以報主皆奇士  
也而皆老氏之學也黃老于漢殆有益矣夫趙事發之  
初敢隨王罪三族而叔輩輒隨迄能白王漢興叛者羣

起而復作於骨肉之間事既解高帝方賢其故臣而用之王且廢猶能自言其國之賢臣此皆非秦世人主猜忌者所能及漢四百年之業徃徃由是基之田叔者既全趙王異時治梁獄又能全景帝母子兄弟之恩誼其子仁為司直戾太子之變又令太子得亡雖坐縱反者得族然皆古之誼烈士豈可以常人比哉

陳平受命誅樊噲囚噲還上崩因留宿衛

平受命誅噲而不即誅受命將屯而不至屯平固知高

金史卷之二十一  
卷二十一  
帝之神已逝而呂氏之勢方熒故寧死君以安身此其所以為智有餘而難獨任歟知臣莫如君信矣

### 呂后

漢自高帝有天下以來常有疑將相大臣之心呂后習聞久矣至是再經大喪其畏忌諸公誠有如辟彊之計者當高帝時后誅韓彭如殺狐兔高帝崩時且欲盡誅諸將而後發喪今惠帝折天國無冢嗣彼將誅大臣以逞固優為也大臣姑為自全之計以待此媪之老且死

祿產庸人平勃取之有餘也大槩欲存漢祚則平勃不可亡欲誅諸呂則太后不可存今諸公以計存而后以老死則漢氏安矣李文饒之說未為至論而呂成公乃於學術上倒斷區區竊謂此時此事無論學術直論機權耳

致堂胡氏之說足以盡西京外戚貽禍之本末矣嘗因是極論之天地之間有陽不能無陰陰而乘陽則宇宙分裂人極隳亡矣女子四陲是也姑以三千年間世代

興亡之迹攷之由三代而下亡於女子由石晉而下亡於四陲皆可數也歐陽公謂宦官之禍甚於女子此固為唐末一代言之耳以古今大勢論則女禍深矣少女子能蠱惑人主以亡國老女子能崇長外戚以亡國三代之亡固皆由是物矣周之東遷以褒姒周雖不亡於此而已衰於此矣秦氏有宣太后穰侯之專莊襄王悅美姬以易其宗漢高帝起於閭閻呂后初無功於王業也而漢初諸人之論每以為呂氏雅故本推轂高帝就

天下

原注田  
生說

又謂吕后與高帝共定天下

原注鄴  
寄語

是以

諸吕之心自謂與諸劉等憫然有取而代之之意而後  
動於惡中間霍氏擁昭立宣光妻邪謀特覺之早耳而  
終不免元后莽新之亂焉曹魏之篡於司馬氏也一再  
廢弒專以母后為之主晉武平吳之後耽惑女寵楊賈  
實召五季亂華之禍天下既為南北矣齊陳以女色亡  
元魏以淫后亡隋文帝起外戚以篡周唐高祖竊宮嬪  
以取隋太宗寵武才人開聚麀之醜子孫殲焉祿山之

起為太真妃也唐雖未亡於此已衰於此矣河朔失而勁兵亡東南虛而蠻禍起非權輿於天寶末年乎朱梁以女開子禍而亡後唐莊宗以劉后殺功臣斬軍賞而亡皆女子之為也自石晉而下則邊陲之禍繼之晉高祖欺天叛君借助契丹而亡於契丹周恭帝雖幼冲儻無陳橋之師則太祖尚遵養時晦之日也自時厥後則又有不忍言者矣嗚呼陽一陰二女禍歷選前代而知之矣四陲之禍其未有涯乎

景帝

景帝天資固深刻而猶有文帝之遺風焉保護梁王則文帝淮南王之餘意也擢用田叔則文帝用長者之微旨也減笞數定箠令何以異於肉刑之除乎禁酤酒何以異於酒醪糜穀之禁乎凡兩朝詔書為民而下者皆當時仁心仁聞不容有所優劣呂氏尊遷抑固其素論也然景詔之不載遷史之畧失之也因抑班氏遂貶景帝何謂也哉



欽定四庫全書

欽定四庫全書

集部

碧梧玩芳集卷二十二至二十四

詳校官庶吉士臣張溥

主事臣呂雲棟覆勘

謄錄監生臣陳遂

謄錄貢生臣王穀

欽定四庫全書

碧梧玩芳集卷二十二

宋 馬廷鸞 撰

五言古詩

館中送鄭著作

士為慾心縛，蝸牛粘壁枯。  
榮華不盈睫，咎責彌八區。  
不有君子人，中流誰一壺。  
公懷天台秋，夙昔廊廟須。  
南宮接東觀，並轡驂天衢。  
幽憂腸內熱，慷慨涕濡縷。  
拜疏上虛皇，誦言折姦愚。  
肝腦非已物，宇宙須人扶。  
恭惟天王

聖肯使善類孤一朝擁麾蓋自詭歌袴襦黥斂股肱郡  
新安文物都斯文紫陽翁千載長昭蘇稻苗新進士倚  
公為播敷繭絲困窮民願公薦藹于勉哉崇明德歸來  
誦唐虞

皇太子生辰詩三首

煌煌炎宋興奕世開燕謀建隆聖人出庚午寶運周祥  
符帝子生已月神光流稽首頌儲君昭哉道嘉猷吹銅  
協乾陽主鬯彌千秋星暉狼弧低海潤青齊收金輪整

鶴駕玉觴侍龍樓無逸能為壽乾乾謹時休

原注  
壬戌

蒼龍見天東房駟拱辰北煌煌心星前炳炳天王側休  
符協乾文正陽毓紫極銅樓藹祥光玉卮奉愉色歡聲

沸笙鸞壽齡指箕翼何以祝元良勉哉崇明德學問日

就将福祿時萬億永侍帝宸尊重暉照四國

原注  
癸亥

正陽毓前星盛事符仁祖仁者壽之基生意一何溥歡  
愉侍宮庭暉潤彌海宇三朝謹師文寸陰勤惜禹新功  
鑑銘盤妙用明絜矩嘉賓從商園末僚愧韓愈永言祝

儲君重離日常午八表躋春臺萬年受天祐

原注  
甲子

用大東萊臨川詩韻示諸兒

惠子五車書彼富吾何慊滔滔歲崢嶸濯濯木荏苒前  
榮悼虛誇新懦就退斂東鄰有碩師箴篋孰云遠斯文  
豈終窮小子宜黽勉寒檠炷老膏此興復不淺

次韻周公謹見寄

十年思美人淵淪抑天飛辛勤種青門竟作抱蔓歸日  
月老賓送霜露沾人衣沾衣何足云八表籠煙霏

空山學仙子滿耳笙簫聽誰知九天上雲扉本不扃度  
世同御風蓬蓬隨飄零又如芬陀花出火而青青

涪翁雪堂仙分誼故不踈投之孤芳篇托根豈云虛報  
以蟠桃實一嘗千載餘洗髓躡閬苑游於物之初

射洪高蹈翁哀歌淚盈盈幽居觀元化悼此歲月更感  
遇三十篇讀之慨余情白露號玄蟬春日鳴倉庚

退之懷桂林藥物珍陸離物情惡衰歇義心感親知我  
生欠一死不死當語誰與我制頽齡悠悠白雲期

七言古詩

題王氏琴清堂

孤桐缺月風露秋夜蟲催織寒颼颼拂牀文字翻葉葉  
古心理沒從何求客來洗予箏笛耳清園琅然散百憂  
南窻無絃鼓愈淡焦尾有桐棄不收卓哉竒士千載去  
已矣竒弄萬古休江左諸王孫子儔琴清之堂遺風流  
飛泉爽籟十二操鏗鏘浮玉鳴天球文王宣父次第作  
此身還見大雅不收拾書囊雜釣具伴君攜琴隱林丘



作詩一為寫竒趣此生此興長悠悠

次韻謝潔齋惠春膏紙

霜毫禿盡千枝竹銅雀臺荒死潘谷哀哉四寶併成空  
猶有老崖藤搗玉青錢學士將相科黑頭刺史朱丹轂  
懷銀早去鎮湖湘拔藻端如起巴蜀天乎歲晚椽斯文  
徃徃長吟書短幅雲昏雨暗白龍牋林密山深紫芝曲  
鳳樓誰助斧斤修魚網不禁塵土辱我馳家畔楮先生  
越薄吳腴此粗俗鏗金戛玉新有聲縫霧裁雲豈堪錄

向來交友文字間  
矢往湍奔如撒菽  
薄材那敢派江西  
一寸詩腸愁萬斛

次韻湯叔遜謝筆墨長句

南屏翁斯文千古何終窮  
清輝靈氣斗牛充  
我從公家二老話  
此事寒更支坐燭  
跋紅哀哉人琴俱亡  
天地覆有刀有玉誰錯  
礪翁今歸然魯靈殿  
砥柱一葉萬仞中  
竭來訪我維摩室  
我起于坐欣迎公  
驚呼絕嘆吾道厄  
客卿穎士委蒿蓬  
竈煤葦管不足用  
宣城黥水無良工

奈何盲卒乘鈍馬欲寫傑作稱詞雄贈公撒雷揮電施敏  
手餘事渲染文字如飛蟲我生哀傷所欠死十年破硯烟  
雨濛一朝洗眼獲玉句金膏水碧浸方瞳翰墨場中身  
老大期公盛氣晚霞同崢嶸素論猶激烈始信迂儒曲  
學如發蒙

謝吳直卿惠嘉樹篇

槐底婆娑生意盡柳邊搖落長年悲殷東陽守徒嗟惜  
桓大將軍自涕洟不知庾叟江潭賦何似延陵季子詩

五言律詩

次趙二車韻

世事真如此勞生何所知功名蟻行磨意氣鵲棲枝于  
焉歌偏好歸來賦足師達人寧自苦天樂更無疑

次李改卿韻

麗句費敲推清吟出競病日長簡編叢春老蓬蒿徑志  
士苦憂時高人思繕性山房讀道書晚花紅艷靜

恭進理宗皇帝挽詞

仁孝初聞代謳歌早戴虞多能天與聖大度祖同符惻  
怛欽刑詔嚴恭事帝圖初終兩甲子經遠有宏模

典學懷終始熙明四十年立心天地厚接統帝王前  
奕臨雍禮昭回贊道篇古今惟理大尊號冠瑤編

天保惟勤政春秋有復讎園陵初謁漢境土合歸周連  
海滄波靜長江兵祲收庚申重立極功與建隆侔

神冊方增授龍髯遽莫攀千秋思沛邑七月葬稽山春  
暗觚稜影星回羽衛班寢門如昨日無復侍威顏

畫拜宸奎賜新編聖訓成孫謀方燕翼龍馭忽遐征四海堯音密三年舜慕情因山圖固在合應若神明

十月二十六日甲子

乘雲傷往歲甲子又今晨莫唱貞元曲誰為寶慶人

原注

前乙酉當寶慶時家弟子是年生

早霜明帶月寒菊艷爭春敢睨昭陵

栢撫呵有鬼神

贈汪泰軒

咸淳辛未汪君對大廷一日羽服訪余固已

警余林下之思矣君輸忠萬言有司報聞余  
以漕幕縻之君不可曰吾且扁舟歸謁子陵  
無愧色足矣此其視聲利為何如詩以贈之  
萬言朝鳳闕一笑落漁舟把我葱珩解從公款段游東  
來迎羽服西去羨羊裘揮手謝漢使蒲輪公所羞  
久雨潦漲未已

一雨遂踰月連朝仍徹宵雷公自收麥田父不耘苗時  
見危垣墮仍聞比屋漂愧無援溺手窮巷有持橈

恭進度宗皇帝挽詞

四閔臨朝淺羣生被澤深儉勤成禹聖仁孝本虞心漢  
殿觴稱玉軒湖鼎鑄金龍髯攀不得清血但盈襟  
道遠年何駛民肥身獨癯寶龜傳聖子玉几導宸謨百  
世尊王度千秋拱帝圖孤臣慙舜輔愁絕望蒼梧

荅趙心游與梭

亦有猗那頌從誰說象賢振振麟趾族煜煜錦袍仙禮  
樂三雍對神明百世傳王孫何處隱芳草自連天



程楚翁訪考亭舊居著閩山集為題其後

有客傳吟藁知渠來自閩四書猶在魯六籍不憂秦太  
史經鄒嶧離騷感楚臣誰知夢奠日曾憶後庚申

挽李樓峯

萬選膠庠上三長渠觀中端從繡衣使直擬黑頭公柯  
爛全枰換舟移絕壑空素交與年盡老眼視天夢

短檠傳邊警長篇罄畝忠危邦韜畫錦劇盜剪春葱地  
隔幾廬舍天憐兩禿翁而今吾後死作傳豈能工

挽徐朝奉

原注徑取先生尊人

海內嗟遺老諸公表逸民  
過庭忠訓在攀檻直聲新  
諫草頻尊主緋花與顯親  
一門名父子千載慶君臣

兒罷金華講翁從林下歸  
清時伯夷粟愉色老萊衣  
洛社風流在襄陽耆舊稀  
瀧岡有名筆字字獨幽輝

次韻潔堂五日

故國天中節吾儕日暮年  
愁心菖歎苦悲緒絲牽疊  
雪虛唐賜薰風絕舜絃窮山  
釘越果醉摘尚凄然

挽費潔堂

井絡璠璣瑞江干英蕩馳萬屯孤宿飽一旅共時危行  
地嗟蓬轉呼天泣黍離百年公有盡一慟我非私  
共事咸淳帝俱生嘉定年江湖正寥濶梁楚忽姻連不  
作武擔掾翻成葛水仙豈忘渠劔閣來閉此荒阡

挽陳本齋

擢第韓歐上論交澗浦邊聲名寧我後官職遜人先徐  
廣生多感龔賓死獨賢拊膺前劫事雪涕大招篇

贈程楚翁

汗竹丹鉛側空花粉黛中尚懷丞相亮肯署大夫雄有  
客來今雨誇予邁古風幽情傾不竭渺渺碧雲東

按此詩永

樂大典失載從新安文獻志採補

五言長律

恭進明堂大禮慶成詩

并序

臣恭聞孝宗皇帝淳熙六年宗祀明堂積雨

頻霽詞臣周必大言曰謂天難諶乃爾易見

謂天蓋高乃爾易回蓋不待執珪幣陳犧牲  
而景貺固已駢轅矣書之簡策至今以為美  
談臣恭惟皇帝陛下寅畏寶命嚴恭帝祖乃  
卜中辛稱秩元祀宮中齋戒禱晴先夕陰雨  
如晦詰旦羣臣奏請宿齋陰霾洞開天日清  
晏迄于竣事景氣融明都人衆觀萬口嗟異  
格天盛德同符孝宗臣以疎庸蒙恩兼掌內  
外制齋宿之夕伏奉宣諭以肆赦之文臣正當

日必有擬述俾臣繳進顧惟書生庸陋何以  
蒙被聖知如此臣於先儒無能為役輒循故  
事撰列明堂大禮慶成詩五言二十四韻繕  
寫上進唐人韓愈所謂辭語淺薄不足以自  
效然而指事實錄則庶幾焉冒瀆宸嚴伏候  
誅戮臣無任感激詩曰

鉅典崇邦祀精禋展國陽泰元神授筭癸亥日宣光藝  
祖郊天始高皇受命長後庚基再造先甲迓殊祥率育

歌時夏儀刑詠我將天街澄析木農扈慶金穰築塞懲  
獮鬻梯山謝越裳宗祈嚴美報親享薦嘉嘗周士咸奔  
走堯民共頌揚青冥淑夕雨華耀炳朝陽月御金波穆  
星流珠幄黃九重紛羽衛十二駕龍驤錫玉琳琅展軒  
朱磬管鏘時行肅天步安坐集神鵝聖孝昭初裸元良  
儼貳觴旗常森姍姍黼黻罷周張柴燄千靈墮蘭膏百  
末香金雞初日麗丹鳳德風翔薄海乾施博垂雲解澤  
滂批周仍躅晉蹴漢亦超唐臣淺來蓬戶君仁點玉堂

恩書容藁進嘉頌媿辭荒有道帝能享難諶聖敢康畏  
威勤夙夜萬壽祝君王



碧梧玩芳集卷二十二考證

第八頁後六行

次韻潔堂五日按潔堂即費伯恭本

集有墓志



欽定四庫全書

碧梧玩芳集卷二十三

宋 馬廷鸞 撰

七言律詩

恭和御製詩

聖作巍巍泰華高，淋漓賜筆洒春膏。  
奎文河漢天垂象，藻思波瀾海駕鼇。  
淳化罕逢休歎昉，大中親遇不誇繡。  
驪珠數十光盈把，何啻春秋一字褒。

直廬峻在九霄高，雨露恩光切仰膏。  
夜炬恩濃超賜錦

春船思澁怯提鼇日磚有影占花隱風鐸無聲引索綯  
昭代崇儒逢聖主小臣待詔愧王褒

恭和御製賜進士韻

熙朝道化聿求成龍袞天臨策俊英清問詳延敷廼聽  
嘉猶入告底于行堯章焜耀欣承渥湯訓丁寧戒近名  
聖主得賢功烈盛小臣稽首願升平

御書道山堂次林竹溪韻

芒玉平雲璽印紅洛龜圖畫五三隆壁奎星聚來時彥

河漢天垂仰化工文治正應淳化似恩華重與紹興同  
何須飛白人人賜始悟君王欲教忠

十月二十日客有言儒學事感而有賦

人知乾德聚奎為文明之運不知建隆幸國  
子監尊儒一念上格蒼穹所謂志壹動氣也  
大中之後建隆前魚爛瓜分且百年地闢天開崇帝學  
河輝斗燦動星躔千齡必反人弘道一念潛通聖即天  
歎息斯文今有幸昭昭奎運豈徒然

和南塘叔賞芙蓉韻

自攜敗冊小窓開三十頭顱四十來  
間日詩書真足味薰天富貴只飛灰  
憐渠每吸醋三斗輸我清餘水一盃  
何似山翁醉花下安排籩豆洗樽壘

雙鶴

荒塘水竭只蹄涔雙鶴翩然啄午陰  
此縱有魚應渴死不濡其味漫窺臨  
病鷓尚畏泥坑辱宿鳥常虞矰繳侵  
何似春鋤甘寂寞一灘藻荇立清深

送建康知錄操襟兄

虎韜尚落諸賢後，鴈塔誰知幾榜前。  
儘向心田寬地步，却將官職信天緣。  
難忘舊日鍾山閣，易趁東風上水船。  
王謝諸人英烈在，問今何策可籌邊。

送湯東澗出守南劔州

掉頭不肯住清都，勇趁秋風乞左符。  
大論崢嶸聳廊廟，雅懷磊落勝江湖。  
丹心豈不戀明主，清節還能立懦夫。  
正是商山訪鴻鵠，歸來羽翼莫踟蹰。

七聚名藩亦甚都龍津劍氣正扶輿斯文孰是南夫子  
此地重逢行秘書忠愛平生在宗社歎愁肯使到田間  
黃花粲粲牽歸興歲晚江空一悵如

秘省和劉左司韻

三年三揖壁奎星當日曾登著作庭大雅重逢君子聚  
斯文還屬聖人興倚天延閣綠雲上拔地方壺歷級升  
自別青藜仙分隔借書獨對短檠燈

病中修實錄

原注十月  
二十六日



明聖當陽四十春十年供奉感孤臣雲龍幄幙天容邈  
河漢篇章帝墨新正始遺音危絕縷貞元舊曲慟沾巾  
焚膏痛記烏號旦目斷稽山欲叫旻

秋雨歎

夜夜黃昏雨打窗愁霖久矣晦明陽天公一怒四山黑  
田父三吁百畝黃禾黍油油生有耳芭蕉點點斷無腸  
病身更與兒俱懶墻角全拋風露涼

久雨遣餉王新班

舍南舍北水漫漫乍霽仍陰暖復寒石補色天原有漏  
泥汚后土不曾乾龍蛇起陸生光怪鸞鳳翀霄怯羽翰  
聊復盤飧餉桑戶可能藜杖過蘇端

十月望日泛舟鵝塘感坡翁後赤壁賦有作

浮浮短艇水風微一枕清溪遠曲崎篷底鎔金斜日碎  
天邊散綺暮霞飛霜凝水落黃泥坂月小山高赤壁磯  
等是初冬一風景感今懷昔自歔歎

二兒就試

老病吾今業已衰已還魏笏尚支頤祝兒指日傳金榜  
懷我當年別玉墀殿陛詳延方籲俊江湖空曠劇憂時  
此行蹇諤論邦國莫為區區杏苑詩

後中秋

金風吹徹玉簫寒志士悲秋思萬端千古淒涼更餘閨  
百年圓缺又重看清輝照膽渾無寐蒼昊催人自鮮歡  
斗酒屬公今夜看只虧些子莫長嘆

次吳園親友韻

乞得危身百尺竿冥心晦息掩柴關自尋別墅開荒徑  
忽見高軒厭轡環海宇沈寥黃鵠舉風濤浩蕩白鷗閒  
劍花落盡長堤圯歎息英雄隱此山

原注吳園為吳王  
舊隱故其地有走

馬堤泮劍  
池隱將源

癸酉春暮鍾信甫寄詩次其韻

深閉柴門水竹村是非榮辱總忘言舍生只懼本心失  
犯患誰知尊足存居士病來惟臥室翟公客去莫書門  
人心日月無今古世道何曾頃刻昏

精誠可使嶽雲開濁世狂瀾挽不回蒼狗白衣從物變  
青山流水喚人來交遊莫作宣明面氣燄終成內史灰  
我有長波一歸艇枕書春睡興悠哉

原注小齋  
扁以歸艇

次胡玉叟韻

莫學前人索送詩我無姱節可提撕忍聽世上新翻曲  
堪笑山中老古錐人境炎涼過駒隙天邊日夜走蟾規  
窮閭又度純坤月誰識初陽變一奇

和許伯脩韻

秋風孤憤只心知接得詩筒為色怡句眼獨參成佛後  
吟肩聳徹欲仙時俗衰競覓胡奴飽節在何妨臣朔飢  
此話只今誰舉似趨時言語正如危

夜病

幻身危抱十年病青眼俄成一旦昏夜席何常卧尊者  
晨炊不擬飯王孫蝸涎有幾春潮湧鷄唱無憑曉日暎  
惟有阿樞癡不去幾回驚起問家尊

游荷溪西禪寺

髣髴招提寄遠村  
緇郎草草佛燈昏  
水將綠遶縈如帶  
山送青來列在門  
向裏風騷者舊遠  
曾中丘壑典刑存  
滿懷孤憤幾株石  
欲起當年兩達尊

三月初四夜宿僧廬

風雨蕭蕭夜未央  
呼童襍被宿僧房  
無腸可斷啼鶻苦  
有喙皆鳴吠蛤忙  
七歲遺孤今老大  
百年遠忌足悲傷  
司晨喚起窻全曙  
歸命清都炷瓣香

次費潔堂韻

誰翻溟渤倒天瓢大地山河等响漂九陌揚塵京路暗  
一聲鳴鴟楚魂招歸心猛折湖邊柳活計頻尋江上苗  
回首神皋雙淚落孤烟斜日短長橋

三月初五日先秘閣忌

鳥啼花落暮春天一遇斯晨一泣然舊業豈無書可讀

遺言猶有石堪傳

原注新  
立阡表

孝思不礙飛遐想

原注自課  
楞嚴資薦

忠憤何由竭報緣廟社已同纓紱盡尊堯千古憶陳編

原注陳了翁三月五日潭州興化寺追薦神考忌日疏  
云報緣如盡捨生永脫于樊籠殘喘若留削髮已離於



綴簪

秋謁此瞻墓

了知五十六年非何處空山叫阿嬭斗酒隻雞雙淚落  
荒林宿莽九原悲黃花委地傷徂歲青筍迎船憶舊時  
廬下夜來霜屨冷韞材持送懶殘師

次韻李竹塢懷古

寶籙炎圖未百年神祖聖伏一淒然徵先生起淹中禮  
與老人期圯上編柯爛不驚人換世瓢空獨樂士希賢

昌黎憤世猶稽古難拗何妨只自鞭

拜祀瞻墓有感

我走金塘十五年新年六十意淒然扶藜策蹇趨廬下  
洗盞將雛拜影前蠹化不妨松飲露鳳棲猶擬栢參天  
微吟緩步滄江晚一抹青山落照邊

我輩小年端午給假蒲酒奉親之外日遊村田  
間致足樂也今老矣竹塢老友近館授徒逢此  
小熟奉一酌道舊且有感於并汾舊事云

香羅細葛端陽節絳帳青衿少小時曩以彈丸俘晉孽  
今於筒黍弔湘纍千年感舊慵開卷一酌銷憂強把卮  
蒲酒少年供母後村南村北恣遊嬉

五月二十夜記夢

生來不作浮名計老去翻驚幽夢奇宮黍不知哀九廟  
廷麻猶聽拜三師睡昏擬草榻前疏寤辟疑催牖下期  
更把在前榮路看癡翁說夢儘添癡

德壽宮古松太上愛之嘗持御香醜酒祠土神

以祈屏蠹賊云時紹興壬午思陵毓亮之歲也  
于今百二十年矣僕生六十年後而十月八日  
又思陵上僊之晨感而有賦

六龍親御奠神州甲子如今甫再周百世尚瞻虞帝祀  
五傳遽抱杞天憂臣民莫廢瓜華敬今古長悲禾黍秋  
歎息餘生孤露甚門弧弓棘總成愁

南來天馬總辛勤內禪經今歷再壬復漢亦符還舊宇  
法堯黃屋本非心思成門外衣冠盡德壽宮前茨棘深

嘆息餘生孤露甚匪莪彼黍涕淋淫

又題德壽宮古松

千歲堂堂十八公  
雨膏露沐貯清風  
龍吟高嘯長身客  
蠹化低摧秃鬢翁  
誰謂虬蟬能撼樹  
不堪蝨賊欲蟠空  
御香灑酒荒荆棘  
腸斷孤臣泣壽宮

與三兒涉穰田渡車中讀朱忠靖中興事實有感

騷情長愛重陽近  
客路歸遲夕照西  
舉目山河秋寂寂

滿城風雨晚淒淒  
老思舊隱盟鷗社  
寒涉深流信馬蹄  
憑軾試看炎紹錄  
空嗟語石與天齊

十月八日有感

日來天馬憤揮戈  
直為當年斧畫河  
萬炬蓮燈照鯨海  
一杯麥飯渡滹沱  
思陵錄上哀榮極  
壽宮前者舊多  
忍把原碑參葉記  
江頭石刻懶摩挲

十月二十日有感

精一危微尚贅辭  
只須三語好為之  
風清月白此良夜

雪暗雲昏彼一時  
玉斧照廊開嗣聖  
金滕納冊付宮姬  
思成門外荒荆棘  
惆悵何人失令規

外孫朱饒歸吳興

出門一別行千里  
閉戶歸休讀五車  
天路塵冥車服驥  
世科墨濕字翻鴉  
繡綉尚憶春暉報  
雲舍無令暮靄遮  
晚歲飾巾吾待盡  
高空摩翮汝橫斜

七夕雨中飲客

羈懷病思不禁秋  
又報西風大火流  
梧葉未凋高樹翠

薇花不厭小山幽，燕鴻來往書生老。  
禾黍高低故國愁，志士悲秋寧復爾。  
樓頭罇酒漫銷憂。

十月二十日感舊

九衢燈火鬧嘈嘈，斗柄低昂列宿高。  
漏箭聲沉金鎖徹，

紗籠影避貴官豪。

原注百官趨行香號燈林立宮前遇執親王之控勒者厲聲唱道紗籠皆

避之烏號望帝窮霄壤，魚爛遺民沸海濤。  
三百五年風雪

夕，孤臣白首卧林臯。

正月四日



皇厭紛拏五季餘萬兵朝遣暮還都虎頭預卜清明旦  
鼇足重開混一區天下歸仁吾有道日中為市爾無虞  
孤臣白首懷佳節奠桂焚蘭淚與俱

次張龍山韻反騷

雪栢霜松自有神衝風槁葉故難禁雲間已閱貞元曲  
歲晚誰聞正始音天地有窮歸幻化聖賢無命亦山林  
愁來又把離騷讀長夜悠悠慷慨吟

冬至

山寒律琯又飛灰萬壑松風冬起雷風景不殊雲黯淡  
雪霜初霽日徘徊無人獻鞞拋塵屨有客傳觴醖凍醅  
天地不教陽德盡韋編曾叩伏羲來

次韻潔堂別歲

月底南枝挿屋椽無人共賞祇凋年我慙王氏青氈舊  
君效坡翁白鶴遷小隱未荒存菊徑獨清難浣出山泉  
歸時好待春江漲穩泛輕舟一葉蓮

用潔堂韻贈徐清溪禱雨

怒起乖龍變，蟄雷神。翁此手更神哉！老天於物何嘗病。

舊雨如人自不來，彼稷之苗餘滯穗。我行其野絕纖埃。

方平狡獪猶餘事，聊慰饑農取大咍。

原注：咍韻殊鮮，正實搜問端，願從旁。

云劉賓客不云乎聊成，小巧以取大咍遂用之。

得熊靜程主簿書，且誨以二父庚甲用舊韻奉

寄

負米無親，不忍嘗誰為故老。在鄰墻百年，寧復知耆舊。  
六甲猶能記歲陽，襟佩書生聯講席。鼓旂騷將角名場。

斯文未敢荒先緒白首遺孤覩最良

苦雨

倦夜拋書病不禁投床無寐雨泔泔長潛舊國山河淚  
細滴孤臣未黍心狂象蹋池喧淖淖飢鴉謀稻愴淋淫  
天公老手須斟酌次第龍分正望霖

謝毛子文見壽

編排老朽我為魁

原注孝宗朝有朝士戲將公卿同庚老少編排出榜某為魁某為次張魏

公黜落今借用綠鬢朱顏可得迴周雅輟吟悲顧復楚騷長嘆

誦恢台鴻飛滅沒孤身在燕逐炎涼幾客來首宿黎祁  
湯餅供一澆眊矐強持盃

次韻朱壻實甫見壽

南華參透解天刑夜夜心香禱玉衡紫蓋十年違帝闕  
青山九瑣夢雲京緇郎寧忍忘天祐白傅空令羨普明  
人以壽歡臣以戚孤懷借酒為澆平

觀魚車渡溪

如帶溪流拍兩崖投泥賈客競喧唳隻輪自力掀諸淖

斷岸先登陟彼嵬江水斗升寧汝活岸旁車馬為渠來

老夫自取鯨鯢戮掩鼻沙丘未足哀

原注漢溝洫志河魚大上輕車大馬

往食之

### 北平家傳成

三百年間事屢危降之人傑豈中衰巍巍祖烈將千歲  
赫赫元功彼一時起義堂碑雲漢麗凌煙閣像日星垂  
藏山自纂前朝史付與雲初百代知

編首

選將初年起范陽和戎晚節誤平涼大功宜受春秋責

盛毀何能日月傷  
文士談兵多謬誤  
蘭臺作史漫裁量

折衷自有成書在  
公論從知千歲長

辨謗

彼美人兮無古今  
挑燈勘史夜沉沉  
昌唐無復浯溪頌

哀郢常多楚澤吟  
麟獲自傷王迹息  
鵲啼誰念帝魂深

祇今莫唱貞元曲  
但憶曾聞正始音

感事

### 餞朱壻

哀郢那能拾穗歌  
卧陶誰復杖藜過  
白頭老我已如此  
青眼看君餘幾何  
風雨夜吟蛩滿砌  
雲山寒影鴈橫坡

暮年親友臨分苦小酌村醪借臉酡

此瞻拜墓

老誦劬勞易感傷一年一度拜金塘食蓮正憶慈顏遠  
毀壁新增苦淚滂松靈穹林成禿帚草荒高冢蔽幽篁  
山哀浦思愁余極陣陣溪風葉葉黃

假汝稀年只八年爭教老境不凄然青山慈母已黃壤  
綠鬢中男餘白顛天外羣鴻隨滅沒雲間孤鶴自蹁躚  
共攜斗酒澆墳土哀淚何由滴到泉



宿岷瞻夜賦

咿軋籃輿度曉岑  
撫今懷昔淚淋淫  
蓼莪老去仍追誦  
常棣新來又廢吟  
有恨臺瓜隨蔓盡  
無情澗藻與波沉  
僧窻月苦夜無寐  
莫詠兒寒動母心

六十年前我已孤  
嬰兒抱母泣呱呱  
昊天罔極幽明隔  
良月就盈今昔殊  
雲塞斷行悲獨鴈  
風林反哺感羣鳥  
澄江只似洹河水  
一碧寒泓照白鬚

過岷瞻墓

白髮蒼顏六十三年年拜母憶中男雲歸別岫山呈碧  
江抱寒汀水染藍草報春暉天罔極樹隨人老我何堪  
薦餘煑茗清泉供淚泣餘潛酒不酣

此瞻道中

蓐食需明出遠村筍輿呶軋睡昏昏禾麻豐歲雲連畝  
風露高秋水落痕清曉跨鞍兒從父當年戲綵母憐孫  
白頭老病松楸隔一望雲飛一斷魂

波粼粼處淺溪沙漁屋低迷舴艋家地老天荒原野靜

江空歲晚水雲賒  
淤泥日課黃金粟  
清泚時吹白浪花  
漫喜時豐阡陌裏  
豚蹄行矣祝汙邪

山中對紫薇花書感

輕盈插向膽瓶中  
看到山林禁籞同  
閣下天葩秋月黯

樓頭奎畫曉雲空

原注紫薇閣三大金字乃寧宗御書

高攀玉樹扶斑白

原注太府寺一株獨盛余嘗侍親其下

靜掃蒼苔拾墮紅

原注西省五株苔痕滿砌余嘗

草制三十年前天  
上夢老來無淚洒  
西風

次許表兄韻

物換星移一慨然天荒地老斷鼇前  
豈無志士王官谷亦有飛仙太華巔  
我若加三逢本命君今過一漸稀年  
兩人中表俱頭白蜀餽纔堪幾幅箋

次龍山韻

新來霄漢冥鴻客舊日風雲振鷺行  
脫下戲衫優便散驚回客枕夢何長  
莫將吳蜀分岐路政把乾坤作醉鄉  
惟有葵傾心不死清魂幾到殿中央

窻間莫問喚祁嘉望斷宗周黍稷華  
斗帳高眠聊避客

深衣暫到漫為家我懷荒草同元亮君悼空絃謝伯牙  
老矣悲歡總無奈仙書頻讀覽荒遐



欽定四庫全書

碧梧玩芳集卷二十四

宋 馬廷鸞 撰

五言絕句

仰和皇太子殿下明裡慶成詩韻

聖主精裡格明廷對月深元良贊宸極盛德享天心  
夕宿猶踈雨昕朝覩大明重光符景貺熙事慶昇平  
鳴鑾回紫禁步玉捧宸梳肆昔遵虞典歡傳十二州

用清秋鶴髮翁韻賦小書招潔堂

幽居抱孤明懷古思舊京渴望寶連山老桂不勝清  
月照窻炯炯蟲鳴室幽幽策杖柴門曉菰蒲半沼秋  
火中寒暑退造物其猶醜老身不繭蠶清夜獨警鶴  
老蟾明孤心涼飈蘇病骨保此中夜存微陽有毫髮  
庭草無言綠林花取意紅因之酌茅柴招喚西隣翁

和潔堂見壽十章

老色上尺宅靈氣虧三田懷我長房翁授汝雞犬仙  
早知無廊廟胡不素丘園揮手謝世氛保此中夜存



我生嘉定間寶運稽炎隆當時貢珍祥今日泣麟窮  
風雨傾燕巢波濤漲鯨海茅簷得此生其誰為爾宰  
大冬嚴寒至病骨裏簷纒羸然祝雞翁不識山中相  
琅琅金薤篇慰此暮年癯誦我徵咎賦誇君摘句圖  
喪亂屬何辜訐訐者誰子生來乏遠猷死去憂良史  
道義挹親仁詩書仰鄰富翠蓬羞排門驪珠驚滿袖  
山哀兮浦思月諸兮日居伊誰百歲期遲汝十年書  
祝公千齡壽小我五月生如何山林槁得並江漢英

七言絕句

贈張君

世間草隸是雲初，汲冢深埋喚不磨。  
五百年間徐騎省，一千年後李陽冰。

人生識字憂患始，底用區區更出奇。  
我欲掃空閒筆墨，只憑老腕把鋤犁。

贈鐵面王說易

春風吹袂過溪塘，有客來稱鐵面郎。  
今代貴人甘軟媚。

可能骯髒倚門牆

京邸漫題

不遑將母兄嗟弟無以為家爾與余獨坐小樓風雨急  
江南歲晚鴈何如

贈彭瀛洲

芸香茗供盡清流十八仙人憶舊遊要是山中好風月  
年來無夢到瀛洲

示程介夫

流年何必共君參  
九瑣青山老一庵  
試檢樂天詩集看  
明年半百又加三

羊腸路險百千轉  
雲夢曾吞八九寬  
豆飯芋羹纔足欲  
水邊林下即心安

迎新倉守曾悅心道間偶賦

黃旂紅幟走跋跋  
曉出闐闐奔迂新  
車蓋如雲騎如水  
山頭牛背有閒人

題張氏勤有堂

世間義理儘無涯桃李春風總一家最恨一般浮淺學  
賣花擔上漫看花

題趙君畫竹

與可知竹子瞻知與可知與可斯知竹矣知  
者無他知其直而已故子瞻之節每似之僕  
於蘇仙無能為役而以與可望王孫無枉其  
節云

霜竿操尚特幽竒直節端如正士姿高拂九霄無曲處

古來惟有老天知

八月十四日記夢

斷鼇立極有前聞鬱鬱昌陵顛藥春起自郇瑕形自著  
曉然入夢匪紛紜

弔柴道士

老子猶龍不可親莊周與蝶孰為真補還石鼎吟邊句  
飛作臨臯夢裏人

謝潔齋惠爐瓶

午夢驚殘撥白灰滿盤雲篆拂輕煤金猊對舞輪困吐  
曾挹天香鼻觀來

宴坐渾如槁木枝鑪煙瓶蓋小窻宜書慵捲起閒今古  
回向心源不動時

帶湖春樹先和公手植也感而有賦

暗香疎影久淒迷咫尺塘邊丈尺泥培植莫教陽德盡  
看花踏雪過前堤

老樹今踰七十霜冰魂玉骨自孤芳大家扶起摧殘後

此是吾家召伯棠

原注和公戊辰即  
世今七十三年矣

感二李

原注平  
泉梁溪

渡海歸來一炷香  
八齋早欲卧僧房  
平泉免向崖州死  
博得生前萬口羊

山中梅花

欲為山巖作好歌  
舊時挾冊向山阿  
我無縫霧裁雲句  
奈此層梯薛磴何

霜崖雪壁花千樹  
玉骨冰魂月一痕  
芳潔不為塵土浣



瓊英跼跼墮雲根

潔堂惠菜餅次韻

落花寒食漫從容  
野摘堪供菜肚翁  
一笑琅玕青滿腹  
紅綾還憶舊家風

紀夢

陽至前一夕夢亡友康至甫遺余墨本晦翁  
像圖列三辰五星其上翁盤礴巨石若坐若  
行旁題一詩慨然有掃清宇宙之志而不能

記其辭覺而有作

白日青天一鉅儒清宵入夢忽蘧蘧覺來猛省戊申疏  
曾說中原亂易除

贈刊字湯生德清

岐陽雨漬鐫功石浯水苔昏頌德碑渺渺昊天須有定  
煩君椎鑿待明時

感時寄鍾信甫

子陵灘下立多時鷗鷺悠悠自識機春事都來無半月

一聲鷓鴣勸人歸

紀夢

夜夢嬉遊到古陂  
翻芟剝芡不知歸  
野田沒膝泥三尺  
拔足汙渠自一竒

十月二十六日有感

賓空後甲再經壬  
香斷金爐已七春  
四十一年民父母  
誰知今日帝乘雲

求菖蒲於李叔翔

風餐雪虐歲崢嶸寸草寒窻獨寧馨長恐出山泉水濁  
塵埃到汝失青青

和許膝嘯韻

塵滿菜衣淚點斑春風桃李見應難奎文忽到茅簷下  
忍作當年義檄看

前年傑直玉堂廬下直歸遲母倚閭早識千鍾誤三釜  
斑衣換得錦衣無

陳菊圃參政寄詩千里外託興於秋燕春花以

示玩芳病叟病不能吟強和四章前二章借  
來意以自傷後二章述愚懷以誌感

風雨危巢萎百花坐看百鳥競銜茶斜陽對語歸飛處  
底是烏衣王謝家

桃李盤中天地寬誤渠鼎實為才慳苔荒草沒渾無恥  
猶自青黃烟雨間

冠綦獬豸服緋花欲獻甘芹謂苦茶誤盡靈烏報凶吉  
終然爰止託誰家

燦燦黃花老圃寬  
秋芳不採豈云慳  
江南九日閨千里  
尚挹寒香紙墨間

寄題程氏菊莊

白賁黃中自不羣  
冷霜涼露伴靈均  
集芳尚恨椒蘭變

何況天桃俗李春

屈平

一觴滷露餐英美  
八表同昏履運艱  
芳節不隨籬下老

悠悠嘉氣眼中山

陶令

一丘一壑圖書府  
三沐三熏煙雨中  
只把空腸受寒綠

誰教腥腐沈清風

天隨子

最愛誠齋語絕佳莫將清苦入妍華  
淡香秋晚誰能道

猶是安陽畫錦家

韓魏公

甕裏醯雞千歲滅  
天邊蒼狗萬重雲  
長生閱世憑何術

欲制頽齡藉此君

浩翁

十月二十日

太乙宮前戎馬鄉  
思成門外野蒿場  
山中一瓣心香在

獨遣孤臣病著床

強提簪笏睇觚稜再拜焚黹淚雨零千古陳橋仁聖事  
不堪重勘舊編青

讀遠遊篇

愁來高誦遠遊篇度世長生豈可傳物變無窮身老矣  
一雞八穀又新年

題楊妃唾壺圖

三郎好女思傾國一霎沉酣四海奔漢業巍巍英主事  
內庭供奉孔家孫



右楊妃唾壺圖第五男端頤得之請廼翁題其後因  
教之曰自古內外庭不分是以人主親賢士大夫之  
時多親婦人女子之時少則天下治矣漢武帝時  
執此物者侍中孔安國也唐明皇時楊妃職之漢  
唐之所以成敗歟然而寵任中書宦官又自漢始  
小子識之

九月十九夜紀夢

是夜夢至一所遇士大夫蘊藉修整衣冠偉

然蓋洪盤洲丞相也與余話言甚歡曰余為  
中書舍人未嘗識虞丞相余夢中憶二公同  
時立朝不記其官位之相去何如也私竊歎  
息以為前輩為給舍而踈廟堂如此豈今人  
所可及俄而內子以皂梢絲鞋呼余更衣乃  
出意若訝余不當草草見達貴者予荅之曰  
吾之忝竊輒繼公後塵正吾好伴也因更為  
公留飯飯畢啟外扉指視天邊虹霓粲然又

歎息久之乃寤是何祥也旦而考文惠本末  
知其生於政和丁酉迄淳熙甲辰得年六十  
八自乾道初罷相閒居二十年優游考終盛  
福人也謹記于冊以希他日之驗云

堪嗟劫運永嘉末忽夢清風乾道初二十年間處士  
可能身世得同渠

十一月十二夜夢南冠舊友感泣有賦

麥秀漸漸禾黍新清宵夢斷泣遺民只憐肝腦輸宗社

不負當年第一人

題芳洲詩集

芳洲黎君先朝名進士也既屈於時益昌其  
詩古詩近陳子昂感遇絕句可雜半山詩選  
中七言如世事莊周蝴蝶夢春愁臣甫杜鵑  
詩所謂長歌之哀非耶因書此編以寓贊嘆  
采采芹甘不自謀慙慙直欲奉王羞可憐斜日三千字  
曾獻當年十二梳

虎踞已知王氣盡  
鶻啼誰感帝魂哀  
怪渠冊後詩情苦  
曾到留都豐鎬來

近聞在舊京賣縵笠子

蚤歲葫蘆依畫本  
暮年臺笠養閒身  
如今半幅騰麻紙  
羞寄鑿坡舊主人

甲子初冬宿直玉堂  
淒風小雨次日即承先帝  
晏駕之變距今二十年矣  
大忌前一日孤臣獨  
眠山庵景象正似當年  
挑燈危坐聞田家鼓笛

之聲淒其有感二首

無限都人哭鼎龍年多澤久似仁宗愁來一樣黃昏雨  
天上人間自不同

雲黯天低結暝陰孤燈對影夜沉沉可憐一曲村田樂  
猶是堯民擊壤音

挽許秋浦

紛紛頂板盡園紅伯仲高騫槐市風一第不酬攀桂客  
千年祇泣感麟翁

蒼顏白髮王官谷  
綠幕黃簾六館生  
閱世舊嗟身偃蹇  
懷人新有淚縱橫

青門何在從瓜熟  
玉水難忘對竹哦  
政復安車裏輪好  
情知老子不婆婆

歌騷讀盡遠遊篇  
淡日寒空引緋天  
遶浦黃花秋易老  
晚香留付子孫賢

挽張龍山

雄篇爛漫兔園冊  
挺翮扶搖鵬背風  
揭日科名輕拾紫

粘天名姓捷園紅

大雅林中集衆英三長正合入承明汗青有日頭無白  
家傳修來國史成

欽翹人物觀竒士芳潤衣冠儼碩師槐柳門前氣成霧  
清風茗盃只談詩

諸公莫唱貞元曲老子曾聞正始音寂寞吳王堤上路  
白楊花落晝多陰

挽李小溪



人是西京長者孫橫秋一鷄早青雲假令折就天邊桂  
竇十郎家不足云

三十年間借一瓶鵠袍門外欠相攜降霜御史風稜惡  
瞎眼春官日色迷

鬱鬱南坡一聚塵荒園野草不成春家聲久矣非前日  
宅相居然亦古人

仙李由來公與侯宋唐相望盡名流金鑾論事嗟無地  
往遡天風記玉樓

題老學道院

大典民彝聖得知斯文千歲以為期  
試看涑水三雍贊何必蘭陵賦詭詩

瓜爛東陵老廢鋤野民八十尚耽書  
窻風文字翻葉葉抱膝長吟一擁爐

白日臨晨老可娛平生有味太玄符  
莫將華皓嗤童習更採玄文扁此廬

繁華泉石兩成癡早學東家晚學西  
章甫莪莪寧汝誤

如今翻恨十年遲

詩餘

水調歌頭

隱括楚辭答朱實甫

把酒對湘浦獨弔大夫醒當年皇覽初度飲露更餐英  
服以高冠長佩扈以江蘺薜芷御氣獨乘清誰意椒蘭  
輩從史武關盟哭東門哀郢路悄無寧人世紛紛起  
滅遺臭與留馨一笑遠遊輕舉三嘆道長世短晦朔自  
秋春洗眼看物變朝菌共靈椿

齊天樂

和張龍山壽詞

老夫耄矣怪新年頓爾衰俱現排悶篇詩澆愁盞酒自  
讀離騷自勸長安日遠悵舊國禾宮故侯瓜畹風景不  
殊江濤如此世緣淺莫莫休休乾坤毀幽懷無限弱  
羽填波輕裝浮海其奈滄溟激灩年華婉婉况六十平  
頭底須頑健戲唱高詞作還丹九轉

沁園春

為潔堂壽

楊柳依依我生之辰與公共之歎裊娜章臺歌翻輕吹

飄零灞岸影弄斜暉花萼樓深靈和殿古人自淒涼柳  
自垂相逢處記吾儂墮地嘉定明時何須夢得君知便  
穩道人生七十稀笑桓大將軍枝條如此陶潛處士門  
巷歸兮幾陣花飛一池萍碎又向先生把壽卮年年好  
祝東風萬縷老翠雲齊

水調歌頭

和深堂韻

老子蚤知退鷗鷺未盟寒癡頑踰六望七寧以壽為歡  
風有黍離傷咽雅有蓼莪憔悴使我不能餐更把南陔

讀淚落廣陵瀾 踏峨峯騰華頂卧王官青山與汝卒  
歲紫茹可登盤乞得白翁歸處莫學緇郎更誤危夢倚  
闌干多謝長生曲顏面怕人看

